

**ያኑሲ ማዶም ዳኪንቴ ጳውሎስ ላሚ ዳኬ ኪኢቶ**  
**ዲሞቴዎሴም**  
**ዓይያ ካሮ**

ሃይ፡ ጳውሎስ ዲሞቴዎሴም ፃኣፔ ላምዓሳ ኪኢታ፡- ዒዛኮ ደማ ማዒ፡ ዎላ ማዳያ ማዔ፡ ደጌህ፡ ዲሞቴዎሴም ባሼ ዘሮ ዘራያኬ። ሚርጌና ዒ ዘሬህ ጊቢ ዳንዳዒህ ዛላኬ፤ ዲሞቴዎሴ ዘሪንቴህ ዬሱስ ኪሪስቶስ ዛሎ ጉሙርቁንቲ ማርካዳንዳጉዲ፡ ኪሪስቶስ ዛሎ ኮዦ ሃይሶና ሚናኣ ጫኣቃህ ማፃኣፓ ዔርዛ ባኮ ኮሺ ደዲ ዒ ዓርቃንዳጉዲና ዎዚ ሜቶና ዒዲንቲና ሚርጌቶዎ ያኑሲ ቃኣሎ ዔርዚያና ኮዦ ሃይሶ ኬኤዚያ ማዶዎ ደዲ ማዳንዳጉዲኬ።

ዲሞቴዎሴም ባሼና ላቲ ኬኤዚንቴ ባካ ዔኤያቶና ፓሠዎ ማርሚህናይዳፓ ሃካንዳጉዲኬ፤ ዓይጎሮ ጌዔቴ ዬያጉዴ ባኣዚ ዎይዛ ዓሶ ባይዚህዳፓ ዓታዛ ሜሌ ማኣዳ ባኣዚ ባኣሴ።

ዬያ ቢያና ዲሞቴዎሴ ማላንዳያ ኮይሴህ ጳውሎሴኮ ናንጋ ዎማዲ ማዔቴያ፡ ጌይያ፡- ዒዛኮ ያኑሲ ጉሙርቁያ፡ ጊቢ ዳንዳዒያ፡ ናሹዎ፡ ደዲዎና ዒዲ ዳኪንቴያና ሃህ ዒዛ ሄሌ ሜታህ ዒ ማላታ ማሂ ናንጋንዳጉዲኬ።

**ማፃኣፔላ ዲማ ዲማ ዓርቁ ባኮ**

ዓይያ ካሮ (1:1-2)

ጳውሎስ ጋላቴ ጋላቶና ዘሬ ዘሮ (1:3—2:13)

ዲሞቴዎሴ ማዳንዳጉዲ ዓይህንቴ ባኮና ላቲ ኬኤዚንቴ ባኮ (2:14—4:5)

ጳውሎስ ዒ ዓኣ ጎይያ ኬኤዚህ (4:6-18)

ጋፒንህ ሃይሴ (4:19-22)

1 ዬሱስ ኪሪስቶስና ዴዴ ናንጎኮ ሃጊ ማዓንዳ ዎዞ ጎይያ ያኑሲ ማላህና ዬሱስ ኪሪስቶስ ማዶም ዳኪንቴያ ማዔ፡ ጳውሎሴይዳፓ ዳኪንቴ ኪኢታ፡-

2 ታኣኒ ናሽካ ናዓህ፡ ዲሞቴዎሴም፤

ያኑሲ፡ ዓዳህና ኑ ጎዳህ፡ ዬሱስ ኪሪስቶሴኮ ኮሹዎ ዒንጊያና ማኣሪያና ሃህ ዎዞና ኬኤም ማፃንጎ።

ጊሞቴዎሴም ዘርና ዘር

3 ቢያ ዎዴ ዋንቴና ርኦሪና ኔ ዛሎ ማሊ ማሊ ታ ሺኢቃኣና ቤርታኣ፣ ታ ዓዶንሢጉዲ ጌኤሺ ዒናፓ ታ ካኣሽካ ያኦዛሢ ታ ጋላታኔ።

4 ኔ ዩኤኪ ዓቢቲ ዓቢያ ታ ዋሊባኣሴ፤ ዩያሮ ሚርጌና ዒና ታኣኮ ዎዛዳንዳጉዲ ኔና ዛጋኒ ታ ኮዓኔ።

5 ኔኤኮ ዓኣ ጎኔ፣ ያኦሲ ጉሙርቂያ ታ ጳቂሣኔ፤ ዩያጉዴ ጉሙርቂያ ቤርታ ኔ ዓሆ ሎይዴይዳ ሃሣ ኔ ዒንዶ ዔዌንቄይዳ ዓኣያኬ፤ ሃሢ ኔኤኮዎ ዩያጉዲ ዓኣሢ ታ ዔሬኔ።

6 ዩያሮ ታ ኔ ዑፃ ኩጮ ጌሢሞ ኔ ዔኬ፣ ኔ ጊዳ ዓኣ ያኦሲኮ ዒንጊያ ማዳይዳ ፔኤሺ ኔ ዲቻንዳጉዲ ታ ኔኤሞ ኬኤዛኔ።

7 ዓይጎር ጌዔቴ ያኦሲ ኦሞ ዒንጌሢ ዎልቁንታ ናሹሞንታ ዒንጋያ፤ ሃሣ ኦና ኦ ዔሬ ዎይሣንዳ ዓያና ማዓንዳኣፓዓቴሞ ዒጊቹሞ ዓያናቱዎሴ።

8 ዓካሪ ኦ ጎዳሢ ዛሎ ዓሶሞ ማርካዳኒ ሴልቂ፣ ሃሣ ዒዛ ዛሎሮ ቱኡቴ፣ ታ ዛሎሮዎ ሴልቂ፣ ያኦሲ ኔኤሞ ዒንጋ ዎልቆና ኮዦ ሃይሶ ዛሎሮ ታኣና ማጋጃ።

9 ዒዚ ኦኡኒ ማዳ ኮዦ ማዳሮቱዋንቴ ፔ ማሊያና ፔኤኮ ኮሹሞ ዒንጊያና ዳቂሺ፣ ያኦሲሞ ዲማዴያ ማዒ ናንጋንዳጉዲ ኦና ዔኤሌኔ፤ ዩያ ኮሹሞ ዒንጊያ ሚርጌ ዎዴኮ ቤርታ ዩሱሰ ኪሪሰቶሴ ዛሎና ኦሞ ዒንጌኔ።

10 ዩይ ያኦሲኮ ኮሹሞ ዒንጊያ ኦና ዳቂሹ፣ ዩሱሰ ኪሪሰቶኮ ሙኪያና ሃሢ ፔጋዲ ዔርቲኔ። ዒዚ ሃይቢኮ ዎልቁ ባይዚ ኮዦ ሃይሶ ዛሎና ሃይቢባኣ፣ ናንጊና ናንጊ ኦሞ ዳዌኔ።

11 ታኣኒያ ዩያ ኮዦ ሃይሶ ኬኤዛያ፤ ዩያ ማዶሞ ዳኪንቴያ ሃሣ ዔርዛያ ማዒ ደኦሪንቴኔ።

12 ሃያ ታ ማጋሣ ዔካሢ ዩያሮኬ፤ ጋዓንቴ ታኣኒ ሃያ ማቶ ዔኪያና ሴልቂዎሴ፤ ዓይጎር ጌዔቴ ያና ጉሙርቂታያ ታ ዔሬኔ፤ ታ ዒዛሞ ሃዳርሲ ዒንጌ ባኮ ዩኖ ኬሎ ሄላንዳኣና ዒ ካፓኒ ዳንዳዓሢ ታ ጉሙርቂያ።

13 ታ ጊዳፓ ኔ ዎይዚ ዔሬ ቃኣሎ ማላታ ማሂ ዩሱሰ ኪሪሰቶሴና ኦኡኮ ዓኣ ፔቱሞ ዛሎና ጴዳ ጉሙርቂያና ኮሹሞና ደዲሺ ዓርቁ።

14 ኦ ጊዳ ዓኣ ዓያኖ ጌኤዦ ዛሎና ኔና ጉሙርቂቂ ኔኤሞ ዒንጊንቴ ባኮ ካፔ።

15 ዒሲያይዳ ዓኣ ዓሳ ቢያ ታና ሃሹሢ ኔ ዔሬኔ፤ ዔያቶ ባኣካ ፔጌሎሴና ሄርሞጌኔሴና ዓኣኔ።

1:5 ዳኪ. ማዶ 16:1። 1:11 1ጊሞ. 2:7።

16 ጎዳ የነሰገሯ ማኣሮ ዓሶ ማኣደንጎ፤ ዓይጎሮ ጌዔቴ ዔያታ ማርጌ ዎዴ ታና የኦጪ ዶዲሼኔ፤ ሃሣ ታ ቱኪንቴሢሮ ሙኪ ታና የኦጪዎዎ ሴልቂ ሃሺባኣሴ።

17 ዒዚ ሮሜ ዓጮ ሙካዎ ማርጌና ኮይ ታና ደንቄ፤

18 ጋፒንዎ ኬሎና ጎዳ ዒዛም ኮሺ ማዶንጎ፤ ቤርታ ታ ዔፕሶኔይዳ ዓኣና ዒ ዎማይዲ ታኣም ማዶቴያ ኔ ኮሺ ዔራ።

## 2

### ኪሪሰቶሴ ማዶ ዛሎ የልታ ዓሲ ማዒሢ

1 ዓካሪ ታ ናዓሢዮ! ዩሱስ ኪሪሰቶሴ ዛሎና ጴዳ ኮሹዎ ዒንገያና ዶዴ።

2 ማርጌ ማርካ ማዓ ዓሶ ቤርታ ታጊዳፓ ኔ ዎይዚ፣ ዔሬ ዔራቶ ማሌ ዓሲ ዔርዛኒ ዳንዳዓያ፤ ሃሣ ጉሙርቂንታ ዓሲም ሃዳርሲ ዒንጌ።

3 ኔኔኒ ዩሱስ ኪሪሰቶሴኮ ማዶ ዛሎ የልታ ጉሙርቂንታ ዓሲ ማዒ፣ ማታሢ ኑኡና ዎላ ገቢ ዳንዳዔ።

4 ፖኦሊሴ ማዔ ዓሲ ፖኦሊሶ ዓይሣሢ ዎዛሳያ ማዓኒ ገኢጌያ ማዓንዳጎዓቴም ፖኦሊሴም ኮይሱዎ ባኣዚዳ ጌሉዎሴ።

5 ዬያጉዲ ሃሣ ጳሺ ጳሺካ ዓሲ ዓይሢንታ ጎይያማ ጳሺኪባኣያታቴ ጳዠና ባሺ ዳንቆ ባኮ ዔኩዎሴ።

6 ዶዲ ጎሽካ ዓሢ ሃኣኮ ካዲሲ ሙዓ ዓሶይዳፓ ቤርታዳሢ ማዓንዳያ ኮይሳ።

7 ጎዳሢ ቢያ ባኣዚና ጳቂሥሢ ማሊሢ ኔኤም ዒንጋንዳሢሮ ታ ኔኤም ጋዓ ባኮ ቢያ ዒና ዔኬ።

8 ሃይባፓ ዔቄሢ፤ ሃሣ ዳውቴ ዜርፃሢ ማዔ፣ ዩሱስ ኪሪሰቶሴ ማሌ፤ ታኣኒ ኬኤዛ ኮዠ ሃይሳ ዬያኬ።

9 ዬያ ኮዠ ሃይሶ ኬኤዚዎ ዛሎና ፑርቲሴ ዓሲጉዲ ቱኡቴ ሜቶ ታ ሃሢ ዔካኔ፤ ያኦሲኮ ቃኣሳ ጋዓንቴ ቱኡቴዎሴ።

10 ዬያሮ ዔያታ ዩሱስ ኪሪሰቶሴ ዛሎና ጴዳ ዳቂንቶና ናንገና ናንጋ ቦንቾ ዳንቃንዳጉዲ ሃሣ ያኦሲ ዶኦሬ ዓሶሮ ጌዒ ቢያ ባኣዚ ታ ዳንዳዓ።

11 «ዒዛና ዎላ ኑ ሃይቄቶ  
ዒዛና ናንገና ኑ ናንጋንዳ።

12 ገቢ ዳንዳዒሢና ዶዴያ ኑ ማዔቴ  
ዒዛና ዎላ ኑ ካኣታዳንዳ።

ዲዛ ኑ <ዔሩዋሴ> ጌዔቴ ዲዚያ ኑና <ዔሩዋሴ> ጋዓንዳኔ።  
 13 ኑኡኒ ጉሙርቂንቱዋያ ማዔቴ  
 ዲዚ ፔና <ዔሩዋሴ> ጋዓኒ ዳንዳዑዋአሣረ ጉሙርቂንታያ  
 ማዔ ናንጋንዳኔ»  
 ጋዓ ቃአላ ጎናዲ ዔርቴያኬ።

**ጆኦሲ ባአዚ ደዲ ማዳ ዓሲ**

14 ሃያ ባኮ ዔያቶም ኮሺ ኬኤዜ፤ ዬይያ፡- ጌይንቴ ባአዚዳ  
 ዔያታ ማርሚ ሺሩዋጉዲ ጆኦሲ ማርካ ማሂ ዔያቶም ላቲ ኬኤዜ፤  
 ዓይጎር ጌዔቴ ዬይ ማርማሢ ዋይዛ ዓሶ ባባይዛጋዓቴም ዓይጎዋ  
 ማአዲዋሴ።

15 ጎኔ ጆኦሲ ቃአሎ ፒዜ ዔርዛያ፣ ማዳ ማደናኣ ቦርሲንቱዋ ዓሲ፤  
 ሃሣ ዔርቴ ማዳ ዓሲ ማዔ ኔና ጆኦሲ ቤርቶ ሺኢሻኒ ደዴ።

16 ሃያ ዓጮ ባአዚ ማዔያ፣ ሃሣ ጉሪ ጌሰቲ ሺር ጌኤዛጋ ሃኬ፤  
 ዓይጎር ጌዔቴ ዬያጉዴ ሃይሳ ዓሲ ጆኦሲዳጋ ሃኪሳሣረኬ።

17 ዔያቶኮ ጌኤዛ ጋፁዋ ከሢጉዲ ጆጋርሳታያኬ፤ ዔያቶ ባአካ  
 ሄሜኔዎሴና ፒሊያሴና ዓአኔ።

18 ዬንሢ ዓሳ፡- «ሃይቁ ዓሶኮ ሃይባጋ ዔቁፃ ቤርታ ማዔ ጋፔ»  
 ጌይ ጌይ ማርማሢና ጎኩም ጎይጋጋ ዳቢንቲ ኬሰኪ ፔቴ ፔቴ ዓሶኮዋ  
 ጉሙርቂያ ዣአሊሳ።

19 ያዔ ማዔቴያ፡- «ጎዳ ፔኤም ማዔዘንሢ ዔራኔ» ዬያጉዲ  
 ሃሣ፡- «ጎዳ ማአደም ዔኤላ ዓሲ ቢያ ፑርታ ባአዚዳጋ ሃኮንጎ»  
 ጋዓ ማላታ ዓይሢንቲ ዓአ፣ ዓጊፁዋ ጆኦሲ ዔቁሴ ቦኦኮላሢ ዔቁ  
 ዓአ ጎይሣኬ።

20 ፔቴ ዳኤፒ ማአሪዳ ዋርቁና ቢራ ዓንጊናይዳጋ ኮሺንቲ ሜሄ  
 ሌሊ ዓአያቱዋንቲ ሚሢና ዓጪናይዳጋ ኮሺንቲ ሜሄያ ዓአኔ።  
 ዬያቶይዳጋ ዛላ ቦንቹንታ ማደም ማዓያ፤ ዛላ ጊንሣ ዳካ ማደም  
 ኮይሳያኬ።

21 ዓካሪ ጆኦሲያ ፔ ቶኦኮ ዬንሢ ፑርቶ ባኮንሢዳጋ ጌኤሺ ካፔቶ  
 ቦንቾ ማደም ማዔያ፣ ጆኦሲም ዲማዴያ፣ ፔ ጎዳሢማአ ኮይሳያ ሃሣ  
 ኮሺ ማደም ቢያ ጊኢጌ ሜሄ ማዓንዳኔ።

22 ፑርታ ማዔ፣ ዴጋቶ ሱኡኬይዳጋ ሃኬ፤ ጌኤሺ ዒኔና ጎዳ  
 ካኢሽካ ዓሶና ዎላ ማዔ ጂሉሞ፣ ጆኦሲ ጉሙርቂሢ፣ ናሹሞንታ  
 ኮሹሞንታ ዓአያ ማዔ ናንጌ።

23 ዑራ ማኸሢ ዔሪ ዔኤያቶ ጌኤዘና ጋሡዋ ማርማሢና ሃሹ።

2:12 ማቴ. 10:33፤ ሉቃ. 12:9፤ ጋሪ. ማፃ 16:5።

24 ጎዳ ዩሱሴም ማዳ ዓሲ፡- ቢያ ዓሲም ሼሌዔ፥ ዓሲ ዔርዛኒ ዳንዳዓያ ሃሣ ዔኤቢ ገቢ ዳንዳዓያ ማዓንዳኒፓዓቴም ዑዑራዳንዳያ ኮይሱዋሴ፤

25 ጎኑም ዔያታ ዔራንዳጉዲ ያኦሲ ዔያቶም ጎሞ ጎንጎቴ ዓቶም ጋዓንዳያ ናንዳኔ ገዒ ዒዛ ዒዳ ፑርቶ ዓሶ ሼሌዑሞና ፒዚሳያ ማዓኒ ኮይሳኔ።

26 ዩያይዴቴ ዔያቶኮ ዒና ማዔም፥ ፃላሄ ፔ ማሊያ ዔያታ ኩንሣንዳጉዲ ዔያቶ ዓይሣ ፒራሣዳፓ ዔያታ ቶላንዳኔ።

### 3

#### ጋፒንፆ ዎዶና ማዓንዳ ፑርቶ ባኮ

1 ጋፒንፆ ዑካኣና ሜታሳ ዎዴ ዩዓንዳሣ ዔሬ፤

2 ዓሲ ፔና ናሽካያ፥ ሚኢሼሮ ጎጋይቃያ፥ ሄርሺንታያ፥ ዖቶርቃያ፥ ጫሽኪንታያ፥ ሾዔ ዓሶም ዓይሣንቱዎያ፥ ኮሺ ማዶና ዛላም ማሂ ማሉዎያ፥ ጌኤሹሞባኣ ዓሲ፥

3 ናሹሞባኣ ዓሲ፥ ዓሲና ዎላ ገኢጋኒ ኮዑዎ ዓሲ፥ ዓሲ ዶንካያ፥ ፔና ዔሪ ዎይሠቱዎያ፥ ዓሲ ሚጪንቱዎያ፥ ኮሺ ማዔ ባኣዚ ቢያ ዒፃያ፥

4 ጉሙርቂንቱዎ ዓሲ፥ ዔኤቢ ዔሩዎፆ ሩኡራያ፥ ጉሪ ሆኦሊንታያ፥ ያኦሲዳፓ ባሼ ፔኤም ኮሽካ ባኣዚ ናሽካያ ማዓንዳኔ።

5 ያኦሲ ጎኔ ካኣሽካያ ማላያ ጎኔ ካኣዦኮ ዎልቆ ጉሙርቁዎያ ማዓንዳኔ፤ ዩያጉዴ ዓሶፓ ሃኬ።

6 ዩያታ ዓሳ ዓሲኮ ማኣሪ ዔርቱዎ ጎይሢና ገሊ ገሊ ሚርጌ ጎሚ ማዳያ ሃሣ ዴማ ዴማ ፑርታ ሱኡኬና ናንጋ፥ ዓያና ላቤ ላኣሎ ዳቢሻ ዓሶኬ፤

7 ዩያጉዴ ላኣሎ ቢያ ዎዴ ዔርዛኔ፤ ጋዓንቴ ጎኑም ዔያታ ዔራኒ ማሊ ዳንዳዑዎያኬ።

8 ዒያኔሴና ዒያምቤሬሴ ጎፆዞንሣ ሙሴ ዒዳ ማኬሣ ጎይፆ ዩንሣ ዓሳ ማሊያ ዔያቶኮ ፑርቱያ ሃሣ ያኦሲ ጉሙርቁዎ ዛሎና ዳቢንቱያ ማዔሣሮ ጎኑም ዔያታ ዒዳ ማካኔ።

9 ዒያኔሴና ዒያምቤሬሴናኮ ዔኤያታ ፔጋዲ ዔርቱሣጉዲ ዩንሣ ዓሶኮዎ ዔኤያታ ዓሲ ቢያ ቤርታ ፔጋዲ ዔርታንዳሣሮ ዔያቶም ገኢጋዓኬ።

ጳውሎሴ ጊሞቴዎሴም ላቲ ኬኤዜ ባኮ

10 ኔኤኒ ጋዓንቴ ታኣኮ ዔርዚያ፡ ታ ናንጌ ናንጎ፡ ታ ማላ ማሊያ፡  
ያኦሲ ጉሙርቁያ፡ ገቢ ዳንዳዒያ፡ ናሹሞና ደዳሞና ዛገ ዔሬኔ፤

11 ዬያጉዲ ሃሣ ዒዲንቴ ታ ዳውሲንቴ ወደና ታኣና ወላ ማታሢያ  
ኔ ዔኬኔ፤ ዓንጾኪያና ዒቆኒዮና ሊሰዲራናይዳ ታና ሄሌ ባኮና ገቢ  
ታ ዓኣሣ ዳውሲንቴያ ኔ ዔሬኔ፤ ጎዳ ጋዓንቴ ዬያ ቢያይዳገ ታና  
ዳቂሽኔ።

12 ዬሱሰ ኪሪሰቶሴ ገንጾ ሃንታያ ማዒ ዓያና ናንገ ናንጋኒ  
ኮዓዘንሢ ቢያ ዒዲንቴ ዳውሲንታኔ።

13 ፑርቶ ዓሶና ጌሻ ዓሶና ጋዓንቴ ዓሲ ዳቢሺ ዳቢሺ፡ ሃሣ ፔ  
ቶኣኮዋ ዳቢንቴ ፑርቱሞይዳ ፑርቱሞ ቃሲ ቃሲ ዳንዳኔ።

14 ኔኤኒ ጋዓንቴ ዋይዜሢና ዔሬ ጎኑሞና ደዳ፤ ዓይጎር ጌዔቴ  
ኔኤኒ ዬያ ጾ ገዳገ ዔኬቴያ ዔራሢሮኬ።

15 ጌኤዠ ማፃኣገ ናኣቶገ ዓርቂ ኔ ዔሬኔ፤ ዬንሢ ጌኤዠ  
ማፃኣገንሢ፡- ዬሱሰ ኪሪሰቶሴ ጉሙርቁያና ጳዳ፡ ዳቂንታ ባንሢ  
ሄሊሳኒ ዳንዳዓ ዔራቶ ዓኣዘንሢ።

16 ጌኤዠ ማፃኣገ ቢያ ያኦሲ ዓያና ማሊሴም ፃኣፒንቴያኬ፤  
ዬይያ፡- ጎኑሞ ዔርዚኒ፡ ዳቢንቴ ዓሶ ዘራኒ፡ ዳቢንቶዋ ገኢገሻኒና  
ፒዜ ናንገም ኮይሳ ማሊሢ ዓንጋኒ ማኣዳያኬ።

17 ማኣዳ ጎይፃ ያኦሲ ዓሲ ኮሺ ማዶም ቢያ ገዳያ ማዒ  
ጳዳንዳጉዲ ማሃያናኬ።

### 4

1 ያኦሲ ሃሣ ሸምገና ዓኣ ዓሶና ሃይቁ ዓሶና ዑፃ ወጋኒ፡ ካኣቲ  
ማዒያ ወይሢ ሙኪ ጳዳንዳ ዬሱሰ ኪሪሰቶሴ ማርካ ማሂ ታ ኔና  
ሺኢቃኔ፤

2 ያኦሲ ቃኣሎ ኬኤዜ፤ ገኢጌቴያ ገኢገባኣቴያ ደዲ ማዳ፤ ዓሶም  
ኬኤዚ ኬኤዚ ሃሣ ጎሪ ጎሪ፡ ዘሪ ዘሪ፡ ገቢ ዳንዳዒሢና ዬያጉዲ  
ቃኣሎ ዔርዚሢናኣ ደዳ።

3 ዓይጎር ጌዔቴ ዓሳ ያኦሲ ቃኣሎ ዋይዜ ዔካኒ ኮዑዋ ዎዴ  
ሙካንዳሢሮኬ፤ ጋዓንቴ ዓሳ ዔያቶ ናሻ ሃይሴ፡ ሃሣ ዔያታ ዋይዚኒ  
ኮዓ ሃይሶ ኬኤዛንዳ ፔኤኮ ዔርዚ ዓሲ ቡኩሳንዳኔ።

4 ዔያታ ጎኔ ባኣዚ ዋይዚያ ዒዲ፡ ጉሪ ሃይሴ ዋይዚሢ ናሽካንዳኔ።

5 ኔኤኒ ጋዓንቴ ቢያ ባኣዚ ዔሪ ካፒንቴ ናንጌ፤ ኔ ገዳ ሙካ  
ማቶዋ ገቢ ዳንዳዒ፤ ሃሣ ኮዠ ሃይሶ ኬኤዚያ ማዶዋ ደዲ ማዳ፤  
ያኦሲም ኔ ማዳ ዓሲ ማዔ ጎይያና ኔ ማዳኒ ኮይሳ ባኮ ቢያ ማዳ  
ኩንሢ።

3:11 ዳኪ. ማዳ 13:14-52፤ 14:1-7፤8-20።

6 ታኣኒ ጋዓንቴ ያኦሲም ዒንጎ ባኣዚ ማዒ ዒንገንታኒ ዑኩኔ፤ ሃያ ዓጮይዳፓ ዲማዲ ታ ዓኣዳንዳ ዎዳ ሄሌኔ፤

7 ያኦሲ ጉሙርቂዎ ዛሎና ዓኣ ያሎ ማርጌና ታ ያልቴኔ፤ ጳዦዎ ጋፒንዎ ሄላንዳኣና ታ ጳሽኬኔ፤ ሃሃ ያኦሲ ጉሙርቂዎ ካኣዦዎ ታ ካፔኔ።

8 ዓካሪ ዒሎ ማዒ ናንጌሢሮ ዒንገንታ ካኣቶኮ ቶኦካ ዓጎሢጉዴ ቦንቾ ባካ ታኣም ገኢገንቲ ታና ካፓንዳኔ፤ ዬያ ባኮ ፒዜ ዎጋያ ማዔ ጎዳሢ ዬኖ ኬሎና ታኣም ዒንጋንዳኔ፤ ዬይ ታኣም ሌሊቱዎንቴ ዒዛኮ ሙኪ ጴዲያ ጳቂሢ ካፓዞንሢም ቢያ ዒንገንታንዳኔ።

**ጳውሎሴ ፔ ዛሎ ጊሞቴዎሴም ኬኤዘሢ**

9 ኔ ታ ኮይላ ዑኩ ሙኩቴ ቃራኩ፤

10 ዴማሴ ሃያ ዓጮ ናንጎ ናሽኪ፣ ታና ሃሺ፣ ቲሰሎንቄ ዓኣዳኔ። ታ ኮይላፓ ቄርቂሴ ጋላቲያ፤ ሃሃ ቲቶ ዲልማዲያ ዓኣዳኔ።

11 ታ ኮይላ ሃሢ ዓኣሢ ሉቃሴ ሌሊኬ። ማርቆሴ ማዶም ታኣም ኮይሳያታሢሮ ኔኤና ዎላ ዒዛ ዔኪ ሙኩ።

12 ቲኪቆሴ ዔፕሶኔ ታ ዳኬኔ።

13 ኔኤኒ ሙካዎ ዒሮዓዲይዳ ካርፑሴ ጎዎሢ ኮይላ ታ ሃሺ ዓኣዳ ታኣኮ ዳኤፖ ኮኦቶና ማሪንቴ ማፃኣፖዎ ባሽ ቢራኖ ማፃኣፖ \* ዎሉዎዎ ዔኪ ሙኩ።

14 ዒሰኪንዲሮሴ ጎዎ ገታሢ ፑርታ ማዶ ታኣም ማዳኔ፤ ጎዳ ዒ ማዳ ማዶጉዴያ ዒዛም ዒንጋንዳኔ።

15 ዒዚ ኑ ኬኤዛ ኮዦ ሃይሶ ዒዲ፣ ማኬሢሮ ኔኤኒ ዒዛ ዔሪ ካፒንቴ።

16 ታና ዎጌና ዓርቂሴ ባኮሮ ቤርታሲ ጌኤዞ ማሂያ ኬኤዛኒ ታ ሽኢኬ ዎዶና ቢያሢ ታ ጌዳፓ ዲማዲያፓዒቴም ያኣኒያ ታኣና ዎላ ማዒ ታና ማኣዴ ዓሲ ባኣሴ። ዬያ ያኦሲ ዔያቶኮ ዳቢንቴ ማሂ ዓርቆፓ።

---

**4:10** ቆላ. 4:14፤ ፒልሞ. 24፤ 2ቆሮ. 8:23፤ ጋላ. 2:3፤ ቲቶ 1:4። **4:11** ቆላ. 4:14፤ ፒልሞ. 24፤ ዳኪ. ማዶ 12:12፤25፤ 13:13፤ 15:37-39፤ ቆላ. 4:10።

**4:12** ዳኪ. ማዶ 20:4፤ ዔፕ. 6:21-22፤ ቆላ. 4:7-8። \* **4:13** ማሪንቴ ማፃኣፖና ቢራኖ ማፃኣፖ- ጋዓሢ ዬኖ ዎዶና ማፃኣፓ ፃኣፒንታሢ ዬኖ ባኮይዳኬ፤ ማሪንቴ ማፃኣፓ «ፓፕራሴ» ጎዎ ሚዎኮ ቁኤሪፓ ኮሾያ ማዓዛ ቢራና ጌይንታሢ ዒልዒዳፓ ኮሾያኬ።

**4:13** ዳኪ. ማዶ 20:6። **4:14** 1ጊሞ. 1:20፤ ዓይኑ. 62:12፤ ሮሜ 2:6።

17 ጋዓንቴ ኮዥ ሃይሳ ታ ዛሎና ጉቤ ኬኤዚንታንዳጉዲና ዓይሁዳ ማዒባኣ ዓሳ ዋይዛንዳጉዲ ጎዳ ታኣና ዋላ ማዒ ታና ደዲሼኔ፤ ሃሃ ዘቦ ዳንጋፓኣ ታና ዳቂሼኔ።

18 ጎዳ ዓይሳዋ ማገም ፑርታ ባኣዚዳፓ ቢያ ታና ዳቂሻንዳኔ፤ ጫሪንጫ ዓኣ ዒዛኮ ካኣቱሞይዳኣ ታና ዒ ጌልዛንዳኔ፤ ዒዛም ናንጊና ቦንቾ ማገንጎ፤ ዓኣሜን።

**ጋፒንሢ ሳራሥሢ**

19 ጲሪሰቂላና ዓቂላናም፤ ሃሃ ያኔሰፖሬ ማኣሮ ዓሶም «ኮሺዳ?» ጌዔኔ፤ ጌዔ።

20 ዔራሰያሴ ቆሮንቶሴይዳ ዓቴኔ፤ ዲሮፒሞሴ ሃርጊንቴሢሮ ማሊዲዳ ታ ዒዛ ሃሺኔ።

21 ባርጎ ዋዳ ሄሉዋንቴ ታ ኮይላ ኔ ሙኬቴ ቃራኬ።

ዔውቡሉሴ፣ ጲዴሴ፣ ሊኖሴ፣ ቂላውዲያና ሃሃ ኪሪሰቶሴ ጉሙርቃ ዓሳ ቢያ «ኮሺዳ?» ኔና ጋዓኔ።

22 ጎዳ ኔኤና ዋላ ማገንጎ፤ ያኦሲኮ ኮሹሞ ዒንጊፃ ኔኤም ማገንጎ።

---

4:19 ዳኪ. ማዳ 18:2፤ 2ዲሞ. 1:16-17። 4:20 ዳኪ. ማዳ 19:22፤ ሮሜ 16:23፤ ዳኪ. ማዳ 20:4፤ 21:29።



**ጌኤዢ ማጻሕፍት**  
**The Holy Bible in the Maale language of Ethiopia,**  
**using Ethiopic script**

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

**ጌኤዢ ማጻሕፍት**

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929